

蜚園詩續集

龍湫老人李確潛夫氏著

余戒不作詩斷自癸卯季冬止然而又有不得已者勉強捉筆隨手記之自悔還自笑也不入正

集作遊戲觀

甲辰元日口號

甲辰元正七十四忽焉不知老之至二十年來醉夢中今朝醒來作何事

王寅旭四十初度索贈言王子年方彊仕而鵬程有待麟兆方將殊深期望賦此贈之

烏鳬仙人下九垓蕭蕭丰骨迥無埃須知此日流虹氣已卜平生煉石才從事酒憑知己勸宜男花傍草堂栽年方彊仕誰云老美玉今看善價來

新安吳子凝七表初度贈祝二首

子凝與余交三十餘年矣變故後不獲親顏教心切瞻馳長君卓凡時復過從得邀音問乙巳歲翁方七十誼合稱觴勢難遠叩且余衰病日甚倘一日先朝露則此情鬱鬱能無飲憾而翁之盛德高年勿一闡揚有事知己乃預作二律書扇頭奉寄愧無長物聊致鄙私云

稱觴遙憶對南山仁壽何須問大還我識胸懷多長厚
天容杖履自清閒壺中偕老金仙眷膝下承歡玉筍班
家近天都可乘興百年今有幾回攀

其二

清歌欲奏鶴南飛千里何能一叩扉洵可銜杯遊蔗境
漫勞扶杖問榆暉忘機心有榮公樂有道顏無卜子肥
從此期頤堪屈指誰云七十古來稀

賦得郭景純兵解

聞說當年郭景純日中兵解不藏身曾稱西省鳴岡鳳
誰念東柯涸轍鱗彤管那知成黑業丹心其奈化青燐
自離塵網登仙籍却勝人間學隱淪

自永錫堂迎

先大人木主歸蜃園深省堂賦謝

沈翁獻臣

獻臣築永錫堂於祖塋之東卽今之懷木庵也
供事迦文延僧焚誦報本之誼至矣又推廣其
孝思凡平昔之交有品望者無子嗣者皆立木
主奉之香火不絕真不匱錫類之盛心也乃確
之先大人亦承推愛立主躋諸賢之列翁之德
可謂榮及九原矣但確自念老病家貧春秋二
祀不得買舟樞謁是得罪先人并得罪知已實

重愧心乃浼楊臯原代訴苦情懇許載歸荒園
供祀卽重違高誼而確之苦心覺不如是不安
者但高厚之恩未知所報謹賦俚言一律稍致
謝私云時甲辰中元日也

堂稱錫類孝思敦先子何期辱惠存位置頓躋賢達次
姓名仍藉鼓鐘尊思親晨夕依獅座愧我春秋闕駿奔
良友情深吾道薄餘生無計報殊恩

九日王寅旭招同社集龍湫時值小雨留宿山房

分逢字

小雨來孤棹芳樽對碧峯祇尋黃菊賞不恨白雲封酒
數苛奚取詩原靜則逢諸君發高響何異聽晨鐘

謝其英張君惠菊

老圃荒涼久幽花不待尋人如交栗里吾似入香林茗
椀秋堪對吟窗夜遂深何須斟斗酒然後豁塵襟

邵靜山先生同止止師過訪別後復貽詩四章賦
此答謝

佳客攜禪侶慇懃訪華門君能敦古道吾得接高論曠
覽來東海幽懷念北昏新詩見肝膈微尚此焉存

乙巳元朝口號

乙巳行年七十五嘗盡辛酸喫盡苦何如投老去深山

耳不聞時目不睹

送劍峯禪友歸秣陵之獅子山卽次來韻

茆齋重過舊盟鷗子夜挑燈話未休臘近喜聞千里信
春來仍作故鄉遊知君已入支公社笑我難登太白樓
竹杖芒鞋從此去隱山不更羨封侯〔王玄弈就山封隱侯〕

夢贈隱士李隨詩

仲春二十二夜夢人告余曰君之族人李隨
者隱士也君欲見之耶余卽訪之不可得乃贈
以詩未成而覺遂改成之

隱士吾宗幾葉人雲山何處老閒身慚予未識烟霞相

飛夢何繇一問津

牡丹名壽安紅者花開三倍疇昔欲作一律迄不

成句僅得一絕塞責而已不免吾衰之嘆

最喜名花是壽安閒庭長日共誰看詩情酒力年年減

獨倚欄杆憶舊歡

牡丹久雨初晴開殊快目喜江宜米宮解民諸季

相集酌花下

牡丹聲價倍從來雨雨風風鬱不開今喜蜚園羣季集

不辭花下醉深盃

題水墨葡萄一絕

瑪瑙卽看懸作串水晶何必不爲簾君今紅白都休問
帶露拖煙味自兼

聞葡萄作酒甚甘但未得西涼州法再戲作此
誰將絲筆寫葡萄水墨淋漓興自豪此是蕊珠園裏種
瓊漿知不減醇醪

修松竹西江宜米宮又菁武仕解民諸阮時以白

粲見惠賦此致意

底事窮途客時來空谷音安貧今日事周急古人心丹
木終難得文莖不可尋（時余耳聾讀山海經）時因惠風至感
慨發長吟

就正草諸集辱朱史公道兄大筆爲留副本小詩
賦謝

自惜巴吟慰索居晴窗欣對故人書重開生面精毫楮
別有深心校魯魚途值窮愁唯我甚交深肝膽信誰如
相知更切相成誼不恨殘編飽蠹魚

衲山和尚過訪以詩來索和題卷次韻以答

春令行來可是冬（用香嚴受付語）巢庵今見鬢陀供忘言

祇說無生法倒屣欣逢大德宗識性昔曾開白傅生緣

何日叩黃龍新詩字字堪深省似勝空山聽曉鐘

乙巳八月家竹西齋前梅放一枝見紅白二色招

同人賦詩紀事次韻一首

丹桂亭亭露有華
攀芳欣見歲寒花
初驚素質含香細
忽訝濃妝逗影斜
玉擬瓊瑤爭並蒂
種疑桃李借雙葩
知君文酒多高會
明月中宵不待賒

胡雪龕寄深柳讀書堂詩來索和勉次其韻

幽居知在水雲鄉
更喜長條繞曲廊
淺碧林塘堪著雨
淡黃時候怯經霜
枝頭鶯語客初到
簾外花飛酒正香
讀罷黃庭明月上
却教人羨玉爲堂

次韻答施仲芳少府

先生名世才道濟
固其事奚爲賦歸
來高尚乃其志
昔稱鳴岡鳳今爲
伏櫪驥誦詩而讀
書博極夫載志時
操龍門筆兼以蒙
莊氣閒發爲歌詩
洋洋風雅致確也
滯海隅未獲侍文
几所喜漢陰丈不
鄙於陵子山志愧
幾在言山意雖未
焚筆硯詎敢傲青
紫蘧廬空山中
逆旅小園裏三徑
已就荒數椽亦旋
圯况讀西方書寧
恥東郭履今則老
且病所欠惟一死
還笑黔之驢其技
止於此可云經品
題而遂稱佳士何
期託神交華袞自
君始茲復枉瑤章
何異讀秋水私心
仰斗山景慕何能
已微名附鴻編殊
勝列青史

丙午元日題於鷗軒

丙午春正七十六詩不云乎哀粲獨哀粲獨今可奈何
不如蚤葬江魚腹

題雙松印月圖

玲瓏石畔兩株松煙靄微分淡與濃却喜夜來東海月

明珠一點戲雙龍

題畫竹

竹有清陰石有苔風流太守渭川才憑誰得個文家法
時見青青拂座來

六月朔日吳卓凡訪我於東濠艸堂艸堂彭氏居
也余住旬日思歸吳子雨中適至附舟東還有

作

身如孤鶴立蒼苔忽憶山廚望客回不信吾衰有天幸
雨中靈鵲報君來

蚤園留別詩

確自辛未卜築小園名之曰蚤已幻視一切矣
至丙申葬先父母作告墓文其第三願今將從
事於斯矣乃作蚤園留別詩告知我者

蚤園居士老無成蚤識滄桑有變更慘淡圖書行李色
低徊梅竹舊交情吾衰那免枯魚泣人去徒增畫虎名
不似士謙能捨宅〔北魏李士謙處士也家富捨宅爲伽藍寺〕艱難

其奈負平生

其二

蜃樓知是幻中成又向南柯夢裏更白髮且分岐路首
青山難負故園情身經多難還兼病老更無能豈爲名
若向台匡埋我骨茲行方不媿餘生

歲除前三日留謝宋橐中兼贈其北行

一枝筇竹兩芒鞋又向東臯養病骸適館授餐吾子誼
〔橐中欲余過歲余以便舟西去不及而別〕感今思舊老夫懷新知
想不歌長缺先澤還堪寶斷釵〔橐老尊公工書法每甚重之〕櫪
驥尚勤千里志金臺從此又天涯

丙午除夕酌無爲壻濠上草堂

世緣吾已澹底事不能忘人豈期橋上舟如泛渭陽春
遲梅未萼臘近酒偏香旣醉且高枕無勞問故鄉

丁未元日口號〔時歷日不用初字最宜樓余所名也〕

丁未春王正一日老夫行年七十七最宜樓上暫徘徊
何似山中適吾適

丙午仲春余來濠上宿無爲壻樓中得句云偶來

濠上宿此地最宜樓時無爲遂以此名之今丁

未蚤春爲足成一律

偶來濠上宿此地最宜樓翠靄連羣嶺〔秦駐雲岫百山環列〕

銀濤泛十洲（東南大海）捲簾星可摘把酒月嘗留爲語
憑欄者家吾足勝遊

正月念七日訪本來禪師於潛居（自丁酉至此忽十年矣）

別久成疎節重來訪素心梅花猶瘦影高竹自清陰老
我耽衾枕煩君漑釜鬻誰知孤鶴意不更羨瑤林

贈乳峯和尚乳峯來訪本公晤余喜甚遂留宿潛
居次卽放舟邀同湯懋之自聞師本公及余至

長橋虹影綠波深爲愛幽樓住碧潯三徑清風高士榻
乳峯所居湧上庵中晤談竟日賦謝

空潭明月老僧心看花客每談玄度揮塵人今識道林
却笑衰年門外漢扁舟何幸共招尋

龍巖上人晤於潛居因哭子失明逃禪自活余不
無同病之感贈之以詩

作客江湖憶壯年而今投老學逃禪相逢亦有如君者
半日清談盡夙緣

贈隨隱法師
悟得隨時義何須問買山塵緣那可謝我法只嘗閒了

了空明鏡如如不動關此中真隱處况復少躋攀
贈自聞上人

竹院曾題舊姓名而今無改是清音如師識我當時面
留客烹蔬話素心〔丁酉余過此有詩今舊主已化去矣〕

輓湯懋之室人王氏

顧影將毋怨吳穹賢閨何減古人風塵埋寶鏡魂何在
瓜摘黃臺蔓已空事佛早皈臨濟法生天應侍大羅宮
悼亡不獨傷遺挂彤管還期譽未終

味木筆花四絕句

供奉休誇舊賜袍穠於仙杏嫩於桃沉香亭北花期晚
獨向春風賦紫毫

其二

當年紫玉出吳宮一點春心孰與通祇爲乘鸞人不至
含辛猶似訴東風〔此花一名辛嫵〕

其三〔與本公〕

花含如筆放如杯筆寫春風次第開更有好懷君識否
一杯留待故人來

其四

辛夷弟讓玉蘭兄香色叢中各擅聲此是西池兩侍者
前身萼綠與飛瓊〔花與玉蘭同形但紫白色異〕

留別本公仍用丁酉年韻

幽栖能不厭只是少紅塵竹色搖空壁鐘聲到遠鄰懸

知無垢地堪老有涯身尚憶青山約松風夢亦真

題簾上畫菊名白鶴翎者

問爾花何種曾披相鶴經不聞丹在頂只有雪爲翎團扇存形似霜毫寫性靈東籬家譜在不更勒遺銘

尤節婦何氏贈言（時周來臣以徐□□乞言來索詩事關風節勉爾贈之）

殉亡矢志不求生冰雪從來自性成知有天心全柏節故教嗣服萎蘭英黃蘆此去同窰窰青史何勞問姓名獨抱苦衷今始剖人綱千古藉扶傾

確遭家難臥病空山辱沈獻翁諸君篤將伯之誼

俾返故園小詩奉謝

無端風雨舊巢傾臥病空山感客情北望我方懷有道南飛君尚念餘生窮途下泣逢羊舌分宅高風見郇成何德厚邀知已盼卑棲重許返柴荆

謝楊臯原老友

予交臯老五十年矣移居事承其始終曲成翁義益厚確罪益深犬馬之報亦云淺矣小詩致謝情見乎詞

曾將交誼比黃金今日能無媿此心豈有魚枯思舊轍祇因絃改負知音楊公世德栽培久阮子窮途沐浴深

犬馬也知圖報淺對君惟有涕沾襟

余承諸友之力得返故園然昔棄今歸竟成兩截

人未免路鬼擲掄再次去秋成字韻一律聊當解嘲

底事松風夢不成山靈母乃笑紛更居鳩已屬新知業
溉釜其如舊友情雲水此時堪寄跡乾坤何處可逃名
須知身累終難遣又向荒園讀養生

夏秋之交值旱四野俱霑吾城獨否適友人有待

雨之約賦小詩自傷

甘霖隔郊郭悲喜得毋殊苗已沾河潤魚仍笑轍枯重
輪不犯畢義馭自飛鳥天意終難問窮愁奈老夫

余歸故園又暫息廬下者三閱月時重九日小阮

庭菊初開乃賦卽事卽景詩一律

重賦歸來彊自寬須知行路古今難堂前絳帳留南郡

〔時臯原孫受業於余故留之〕廬下衰翁寓伯鸞耳較少陵聾已
晚〔工部有耳聾詩時年六十余今七十有七亦云遲矣〕膝如元亮近麤

安餘生幸不先朝露又許黃花帶笑看

菊有名金松子者花小而叢密旁無大葉殊可愛

玩援筆賦之

幽花知不愛秦封曉圃妝成滿月容庭畔可憐名小小

燈前偏喜影重重如來海藏尊金粟仙子蓬萊重赤松
今日現身三徑裏祇憑樽酒識芳蹤

又卽事十韻

之子何爲者栖栖效處堂場宜收傀儡丸只抱蜣螂分
宅誠高誼懷居鮮俠腸虎嵎良可畏鷹飽正須揚荆國
非吾土并州豈故鄉須知蠶則績可曰蟹無筐地產茆
斯拔天時雨亦滂淇園拚削跡東閣或留香見說堪消
夏無何又履霜囊空無贈別爲誦式微章

贈如璧如金兩姪孫

吾家河東一宗家世力田景愚四弟少余七歲
一鄉之善士也兩孫于父在日析居矣今父歿
祖存兩孫商復合爨以養其祖兄沿外務弟理
田事而妯娌亦俱順德尤人家所難今祖又物
故予往弔得悉其事乃大喜慰之曰此真古人
行事爾兄弟能之超出尋常流俗矣使兩孫少
習文史識書義則漢時孝弟力田之科舍爾其
誰耶乃作此勉之其膺天之眷有不必言者矣
棠棣誰能繼好音吾宗友愛一何深田荆已析情偏浹
姜被重溫誼足敦力業儘堪恢祖業同心真足格天心
壘簾况復兼琴瑟古道吾欣見自今

戊申元日口號

戊申春正七十八老夫耳聾妻白髮所喜良朋以手援

蜃園重見梅花發

和陸古塘絕句一首

石梁飛瀑石門松古洞無人碧蘚封倚杖尋僧知在否
白雲深處一聲鐘

穀雨日賦得花慚背牡丹

牡丹向於清明日開余有詩記其盛今爲雨遲
至穀雨雖紫豔香魂依然如故而主人各天所
謂自我不見於今三年矣余老且病兼以無酒
無穀不能爲此花作東道主徒有浩歎而已乃
拈唐人句賦之以志花神落寞之感云

牡丹開日故遲遲雨雨風風此一時客似避人兼避地
花仍宜酒更宜詩封書千里憑誰詢香夢三更只自知
徒使落紅悲滿砌天涯遊子竟何之

邑博王徵先柱訪確以久病失迂又承投贈瑤章

賦此答謝

最喜河汾駕荒廬辱惠存禮應勤倒屣病久罷迎門攬
勝懷偏曠尋幽誼更敦神交感投贈何以答瑤琨
午日初晴志喜時門人王仲雲詩來以艾虎舟龍

爲對余改正存之

黃梅雨歇見晴峯又是佳辰一度逢艾以辟邪懸似虎
舟因弔古泛如龍金樽翠袖侯家宴綠酒青蒲處士供
薄醉起來吟未就前村遙見夕陽春

越上陶天章道兄和余七哀詩三首賦謝

如君才誼世應稀玩世人今是也非品比士行多令望
詩如元亮自清機無緣廬嶽栖宗炳那許天台訪子微
他日擬邀千里駕追陪同上釣漁磯

六日廿日走哭巽女詩一首

確日暮途窮所藉以慰遠懷者此爾不謂六月
十八病痰訃至走哭之痛何可言知已勸余自
寬明知悲號無益而苦痛極至不覺雙淚之迸
下也况衰妻尤甚鍾念厚望者大約彼蒼故欲
困予於衰暮亦付之無可奈何而已小詩迫切

情見乎辭

傷心不覺一號呼那免衰妻痛哭無汝病久爲魔所困
予貧難信命偏孤將母事佛辭塵眷〔臨終尚誦大悲佛號〕可
不思親棄半途兩老祇今西向望幾迴腸斷淚痕枯
讀遲禪師爲新安汪翁作秋霞圃記索題一律
結廬何必向深山記讀秋霞信可攀置我恍遊上壑裏

思君時在畫圖間峯成六六雲千頃徑闢三三水幾灣
聞道主人兼好客門雖設也不須關

輓沈子仲潔

（獻臣次公也年三十五）

世誼君家分外優花時曾共訪林丘吾衰尚擬親蘭佩
人去偏傷賦玉樓未許青雲酬壯志只憐白髮長新愁
山陽日暮聞長笛悲感能無涕泗流

題

五城黃母張孺人節孝冊子

（爲王遜老索賦）

霜幃血淚幾曾乾不忍遺言負舊歡溝瀆一朝殉死易
冰霜百鍊立孤難雖無國典旌完節喜有仙靈表寸丹

〔呂公題卷〕

笑我老非彤管客也將名姓殿詞壇

江右高士曾日永代送彭太僕遺殖歸里小詩寄贈
（日永諱景萬安人）

明海鹽彭觀民先生諱期生於崇禎末年授湖
西道至丙戌正月先生移守贛州比兵至勢孤
援絕城陷登城樓自縊死命家人舉火焚其身
家人馮吉張卿詹宇道俱同日死長班揚大器
收遺骨埋真武寺供臺下託友人曾日永曰吾
將入廣俟歸時送骨還彼處也今別二十三年
絕無消息日永念前言成友志遂起文就道一
路盤費出自萬安縣公胡邕蕃諱樞與彭同府

人也日永於某月某日到彭氏家夫人命滴血
辨白舉家哀慟發喪受弔時嗣君仲謀遠出未
歸乃就□□權置厚款日永哀百金遣之歸
先是觀翁殉難報至中外疑信者半浮議頗
騰仲謀墨羊重繭自章貢撫棺歸已發喪受弔
然事出權宜彼時浮議旋息今幸遺殖遠歸則
先生殉國之忠愈明且百年同穴之志始慰曾
君此舉其爲德於彭氏者大矣昔宋文文山死
門下士張全義收送骸骨歸葬人皆義之今曾
君於先生未嘗謀面祇欲成全故友之誼不遠
千里送歸其誠心高誼行古人所未行之事視
全義不啻百倍過之確聞而高其行異其人作
俚句贈之使世知有曾高士云

殉國丹心久愈明欣逢遺殖返佳城忠謀扶襯酬前哲
〔楊大器〕誼不寒盟負友生〔曾曰永也〕高行肯辭千里駕霜

幃重慰百年情〔夫人年七十八〕知君似勝張全義應共文

山顯姓名

已酉元日口號

歲逢己酉七十九案有殘書樽有酒憑人問我益者三
笑指梅花交已久